

T5236.05/4462

126

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 20 1940

文苑英華卷第六百六

請朝觀

此卷英華所編失
年代先後今正之

為房州長史請朝觀表一首

為張侍郎乞入觀表一首

再請入觀表一首

李令公乞朝觀南郊表一首

皇帝遣和請朝觀表一首

青帥乞朝觀表一首

為陝州盧中丞請朝觀表一首

鄜州李僕射乞朝觀表一首

杜尚僕乞朝觀表一首

中華書局影印

文苑英華卷第六百六

請朝覲

此卷英華所編失年代先後今正之

爲房州長史請朝覲表一首

爲張侍郎乞入覲表一首

再請入覲表一首

李令公乞朝覲南郊表一首

皇帝遣和請朝覲表一首

青帥乞朝覲表一首

爲陝州盧中丞請朝覲表一首

鄭滑李僕射乞朝覲表一首

杜司徒乞朝覲表一首



鄭相乞朝覲表一首

為楊大夫請朝覲表三首

請朝覲表二首

孔大夫請朝覲表一首

崔中丞請朝覲表一首

李大夫請朝覲表一首

為房州刺史請朝覲表

上官儀

臣某言臣一介薄才不周時務命隨事偶超竊宦途歷職文武榮兼內外年餘三記受恩兩朝循涯省分實優常品自違丹陛寒暑亟移限以大藩久絕朝覲頃以年頽疹迫風眩日增懷闕庭而載佇仰雲霄而聳望陛下昔居春

臣預應朝集披膽祈恩特蒙鑒許尋奉明詔入衛鈞陳
澤曲流其來自遠誓生沉族未識所酬今以衰疾之年久
違趨拜望充計吏一奉宸闈頃者希天聽卑期照心靈振
蕩冰谷非危干黷旒纒伏知待罪謹言

為張侍郎乞入覲表

德宗

時任黔府觀察使

呂頌

臣某言去貞元五年於延英殿賜面辭之日親奉進止

謹令臣一考即來者臣謬承聖獎猥守方隅自到黔中首

末三年更入新正即及四載臣素以微書一作生叨居重鎮

恭行朝旨宣諭皇恩種落遠人庶幾於理伏以遐荒僻阻

控帶諸蕃溪洞蠻夷性本生梗木石為伍鳥獸同群寬之

則伏匿山林不遵王命一作迫之則結聚蜂蠆害及邊陲

臣於撫馭之間酌其中道示以一作威惠諭英華作論非以憲

章以清淨臨人以不擾為政開設學校令知君臣父子之

道勸勉一作課稼穡令知生成衣食之原減其征徭蠲其力

役今國恩遠及夷落大安萬里勤王一方無事臣管內素

多瘴癘山峽重深毒霧蒸雲常在窓戶四時多雨不識霜

雪終歲陰昏少見天日出門無路舉目唯山猿鳥之心如

在籠檻臣從去年冬初忽染脚疾膝脛頑痺行步一作立艱

難絕無醫人素乏藥物深山窮谷無處市求任重命輕六

可言疾一作病臣先奉進止一考令歸又準勅文二年與替

臣今歲月以一作已久疫癘交侵况奉綸言難堪更住臣又

辭天闕一作闕庭戀切龍顏瞻望天門不勝涕殞無任攀戀切

道之至

再請入覲表

前人

臣某言臣去貞元五年面辭之日親奉進止今臣一作考即

來臣謬荷聖恩擢居方鎮炎瘴之地首末四年恭守廟謀

一作謨宣布皇澤唯以靜理惠卹遠夷今縣道晏清干戈罷

戢雕題左袵萬里勤王溪洞之人無不樂業此皆聖上一作

主之恩豈是微臣之力臣從前年六月患脚膝行立艱難

秋深已來更染風疾又從去年六月直至今日不見三光

山谷昏昏終日陰雨吞茹瘴毒實所難堪伏奉勅文二年

與替况奉進止一考令歸臣疾癘所侵氣力衰敗一作慙素

無醫藥恐不支持臣伏見近日已來楊或作暢悅孫誠李速

裴腆皆在遐裔相次喪亡特乞聖恩全臣性命許臣準勅
歸赴闕庭再覩龍顏灰粉無恨臣去年十二月已進表陳
乞情有至切再黷宸聰伏乞天慈救臣疾苦一作不勝懇
迫憂塞之至

李令公乞朝覲南郊表

于公異

國家以來年正月五日告謁宗廟柴燎南郊率土同歡室
家相慶臣已陳乞願奉大儀監使王敬親至陛下以西門
式過未蒙矜遂夙夜惶戀心如焚灼日覩漢儀猶傳故老
况臣累塵清貫謬處台司侍奉翠華未爲失任丞承顧問
亦近守官旣違捧日之誠益慕告天之慶伏惟皇帝纂戎
聖運光啓帝圖澤流亭毒一作育之源化溢舟車之外今者

以天地交泰華夷大同明發以展神宗陶匏而郊上帝紹
前王之闕典納殊俗之始賓九域駿奔傾皇都而壯觀度
官少肅扈清蹕而徐驅臣於此時獨守蕃鎮伏惟陛下鳳
翔密邇或多戎梗未可輕離臣酌事宜必無所慮何者吐
蕃所有兵甲悉不在邊流沙巴西纔有烽戍况其畏威讜
伏向化協和自安戎貊之邊敢犯漢家之塞吳說之居隴
上李觀之處涇州旣承聖謀各有成筭以此制敵何憂撫
封臣於鳳翔亦擇留後度令軍務皆叶權宜又以州縣雖
存黔黎未復徒御旣衆供承則難臣當倍道兼行遺於入
侍謝車捐騎才取成容則岐路有載馳之章郵亭絕告勞
之費以此利徃未爲擾人今者設壇場告天地尊嚴執禮

陛下當元首之名贊拜陳儀臣子漏股肱之用臣且自愧人何以觀乞陛下特降洪私容臣朝聘俾汪洋皇澤亦霑戎屏之臣肅穆旌門粗識昇平之禮既均情於故老庶無愧於子牟退入泉壑不為恨矣

云云

皇帝遣和請朝覲表

前人

臣某言伏奉手詔聖躬頃暫違和旋亦康復鼓舞歡抃倍百常情然且爾來未有人到惶戀之至寢興無寧何者臣義忝寵榮恩當彌亮聖躬乖理股肱何安是以瑣瑣寸誠款款微志思陪朝列一解漏疑容之憂或從良醫待獻千金之藥頃以陳乞願得輕行未蒙還旨猶增戀慕且睿謀弘遠邊鄙方安春候轉深戎馬難動以此揣度固無憂慮

伏乞聖慈許臣朝謁輟旬時於藩鎮候安否於宸顏臣之微願於斯畢矣

青帥乞朝覲表

柳冕

臣某言臣備位方面守鎮

一作在

海隅顧無理平之績猥受

增秩之榮而不自媿者顏之厚也竊感江漢朝宗之義鹿

鳴君臣之燕頌聲之作王道之

唐書作本

始也國家自兵興之

後不遑儀

一作議

禮方岳

唐書作牧

未朝讌樂久缺臣限以一切

之制例無朝集之期日不覩朝廷之禮耳不聞宗廟之樂足不踐軒墀之地十有二年于茲矣犬馬齒衰益深戀主葵藿將暮空仰太陽古人云日雖不為葵藿廻光然向之者誠也臣職在戎馬身辭日月願因朝謁一見漢儀會

一作

亦臣之誠也傳曰朝以正班爵之義會以訓上下之則朝會者禮之本也臣安敢忘故群后四朝以明黜陟唐虞制也五歲一見以考制度殷周制也三載上計以會考課兩漢制也其或不朝則以禮讓之故孟子曰諸侯之朝天子曰述職一不朝則黜其爵再不朝則削其地三不朝以一作則六師移之然則諸侯朝會尊王室也可以廢食不可以廢朝洎秦滅古制罷侯置郡漢立王侯並建守相聖唐稽古兼而用之故天下朝集三考一見皆以十月上計至于京師十一月禮見會于尚書省其朝覲也應考績之事至一作元日也陳筐篚之貢集於朝唐書堂唱其考第進賢其以興善簡不肖以黜惡穆穆濟濟靡然成風太宗之遺政

也自安史亂常始有專地者矣四方多故始有不朝者矣戎臣恃險未有悔過者矣臣忝閩外一作牧之寄竊憤不朝之臣故每忘寢與食思一入覲庶因微臣率先天下則君臣之義親而不踈朝覲之禮廢而復興一作臣之幸也常唐書恐負薪之疾溢先朝露覲禮不展歿於下泉臣之憂也又臣四年已來頰乞骸骨聖恩哀憫許為擇替無德而祿殃釁荐臻臣雖上恃天慈不殞瘠癘而下悲骨肉繼以死喪及聞諸將帥亡沒亦眾臣自悼何德以堪久長昔公子牟身在江海之上心馳魏闕之下則鄉國者人情不忘也闕庭者臣子之戀也朝覲者國家之大禮也是三者人之大願伏乞一作陛下憫臣丹懇許臣入朝再謁聖顏萬

舞稱賀一作慶斯願畢矣無任懇款屏營之至

為陝州盧中丞請朝覲表 德宗 周行先

臣某言臣家忝儒門才非國器生休明之代遇堯舜為君束髮從官三十餘年矣曩日佐幕獲在湖南蒙先聖察臣効愚錄臣克謹歷外臺三院知留務五年頻降絲綸驟登朱紫天慈子育不集戾於微躬君父之德且深昆蟲之力難報臣某中謝伏惟陛下繼明授圖誕敷至化特授以刺史兼經畧觀察等使頃容管鎮任職方隅逮茲五考要荒外服僻陋在夷不能賦車籍馬以給國儲不能餼牽饋餉以賑軍食忝列位聯率慙無匹間歲陛下避狄奉天省方梁漢臣不獲身當矢石血濺堯渠及陛下掃除妖氛再造

區宇臣復不獲扈蹕清道執戈啓行且霜率土之毛莫展事君之節此臣所以內訟刻骨上思訴天苟貪符竹之榮實懼素飡之刺臣今年踰知命齒髮已衰官守炎陬星霜屢改之中和之理行無考課之彰聞而炎癘暗侵桑榆漸迫常恐一先風燭未謝聖朝况復不識覲見之儀未知班瑞之禮羔鴈列序空聞於禮經鸛鷺同行欲求於夢寐伏惟皇帝陛下煦育動植酌心元元垂仁降慈俯遂愚懇許臣得對歎休命抃舞薰風則朝拜玉墀夕歸泉壤愚臣生不恨矣一作免死且不朽云云

鄭滑李僕射乞朝覲表 馬惣

臣聞臣之事君如子事父子有晨昏之道臣有朝覲之儀

載罹寒暑之遷豈勝犬馬之戀臣聞古之郡國皆有邸第
列在京師出命守藩入令述職所謂百谷朝海衆星拱辰
伏惟皇帝陛下德伏萬邦理臻三代夷夏率俾沉翔昭然
臣頃受任番禺星霜七變身在南海心懸北闕特蒙渥澤
徵領宗司方厠朝行旋牧關輔東郡缺帥又忝戎雙旌
自天便道之鎮赤墀輔疑作轉遠伏謝無因及茲三年丹懇
每結况自貞觀之後迄于聖朝臣之一門繼荷重任擁旌
鉞者僅二十人高祖淮安郡王神通弼亮太宗戮力締構
榮登左揆以寵勲勞臣無先祖之功而塵先祖之位師長
宗秩胡堪謬到是願罄述愚志一覩聖顏宵膳九迴晝食
三歎今河朔軌道抃宋底寧臣所部宣物睿慈綏緝黔庶

師旅知訓農桑以時徵賦有常廩儲有備但以違奉既久
心不違安輒敢冒昧上聞特希矜許入覲臣獲蹈舞班叙
親承德音却歸方隅生死榮幸云云

杜司徒乞朝覲表

劉禹錫

臣聞事君之道有死無隱懇誠所至敢不罄陳伏惟聖明
俯賜矜察臣某中謝臣代受國恩忝承門蔭脫巾筮仕敢
期榮名陳力効官靡樹聲績始因人乏集作孤直驟歷清班復
荷朝獎作藩外府遠適輦下十有四年恪守淮濱于集作逮

今一紀犬馬戀主寢興匪遑蒲柳易衰遲暮俄及竊位時
久妨賢愧深况歷任集作官已來四十八考祇奉朝謁時纔
二周服勤郡府荏苒垂老屏營魏闕之思夢想承明之迹

集作遊如迫餒寒不忘衣食伏惟睿鑒俯亮愚衷早賜擇人

與臣為替交受集作授之際冀無可虞然後脂車奔赴京輦

微願斯畢雖死且集作猶生臣頃以戎務方殷猥加宰輔今

既事罷實慙此名為有藩鎮同時未敢輕上印綬伏以聖

朝赫奕左右惟賢漢愧得人周慙多士臣才略既短齒髮

且集作又衰柄用之地甘心自絕所冀退歸舊里沐浴皇風

絕鍾鳴漏盡之譏展維桑與梓之敬匪惟名器不假實貴

骸骨獲集作可全知止之心神祇可集作所鑒無任悃欵屏營

之至

為鄭相請朝覲表

元固

臣某言伏以受恩之地中外則同戀主之心遐遠愈一作逾

切臣素無方畧又乏理能徒以久侍掖垣嘗叨衮職罪

彰於負乘位猶忝於藩維一邁闕庭累變寒燠虛當重任

未答鴻恩一作秋常恐愚効未一作莫中官謗將及敢不誓心

奉職克已臨一作勤人哀矜獄情節省財用蠲途誠慎終日

憂慙而百越殊風庶疇失業流庸未復於田里逋賦仍積

於歲時邕管防虞尚勞師旅海南饋饌猶資費用軍府屢

空物力將竭至如奉宣化理一作皇化恭守國章臣實盡疲駑

庶禪萬一將使寇戎珍域食貸豐滋臣雖策勵終亦無及

伏乞聖慈矜念天鑒照臨察臣審分之誠哀臣瀝懇之意

儻獲言旋京國重覩天顏則及黜無恨於淮陽馬援不辭

於瘴海矣微臣幸甚無任感恩戀主踴躍之至

一作皆唐類表

為樓煩監揚大夫請朝覲表

令狐楚

臣某言臣聞君猶父也臣猶子也子事父有冬溫夏清之禮臣事君有大聘小聘之義臣雖庸鄙常感斯言今類表乃地離京師千里而近身去王室十年有餘心既傾而陽光未廻日已極而雲路猶阻此臣所以形留神往淚盡血繼者也况監司之寄甚重馬乘之務非細或物有因襲革之而無妨或事無典據為之而有利咸非翰墨所可升聞貯于中心期以上達伏惟陛下廻天地之鑒垂日月之明俯借恩光暫今朝奏儻得飛纓於赤墀之下委佩于彤庭之前日見龍顏足履丹地則犬馬大幸與天無窮無任懼

歎之至

同前

前人

臣某言臣自罷侍龍樓出班馬政星霜驟變十有三年伏惟陛下光宅寰瀛惟新景命奏簫韶之九變獨臣未聞舞干羽於兩階唯臣未見累歲有違離之苦終朝懷戀慕之誠是以屢獻封章懇求朝覲愚衷不達聖眷未廻邊山之躑躅愁結比者臣雖庶鄙兼領嵐州職在治人固難離局今既專知監務特有使名伏櫪多暇望雲增切且臣所部濱類表河近塞兵家利病時事便宜難於遠陳願一敷奏而况道途非遠僕御不多次舍之費誠未擾於郡縣往來之期當不踰於旬月伏望俯廻天鑒曲遂臣誠心使

得稱慶於中朝然後代勞於外廐至願斯畢死無所恨無任懇迫懇結之至

同前

前人

臣某言臣聞心孤者觸緒而悲意切者發言皆懇揣情循理今古同塵嘗謂無之今乃信有臣某中謝臣雖頑鄙無取亦嘗側聞長者之論上自古昔迄至於今才能事業百十於臣而不升名官之級不知祿廩之數者何可一二其紀臣某無耿介之秀或作飾開濟之能且有極愚至陋之累而微生際會事陛下於藩邸之中周旋出處雖無擁金神聖之績便蕃左右曾有侍從言語之樂竊自欣賀若昇雲天伏惟陛下握圖御極凝旒垂象惠均於動植信及於細

微擢臣於方岳之中委臣以監牧之務仰憑殊造俯竭衷封人粗安國馬稍息今者秩視賓客位為大夫耳煩絲竹之音響口厭梁肉之滋味馳驅駿足偃息華攘蒙陛下覆育之恩已為太過顧微臣止足之分實所甚榮豈敢更冒寵光別求獎用伏以狗馬之齒衰暮相迫螻蟻之命危殘不常日往月來懼貽敗覆天地相分不勝瞻戀每至木葉下邊馬嘶切思指畫君前以畢平生之力常恐先霜露填溝壑不見丹闕長恨黃泉伏惟陛下仁愛惻隱及於萬類察臣之至願表一作知臣之赤心使一入帝城死無所恨無任一作不勝哀迫懇苦之至

請朝覲表

符載

臣某言臣聞臣之事君猶子之事父苟聞庭之侍曠晨昏之禮絕擬議名教得爲孝子乎臣自違天顏二十餘載身不趨宮闕之地心不展烏鳥之誠戴天嚮日肝肺焦灼况臣暮齒筋力漸衰以中人之材當大潘之寄智慮昏殆政術荒踈自揣封疆固多敗累豈可使萬人稟無德之令四方興尸祿之譏踣形顧影月慙歲恥方今赫赫大國髦彥如林采於衆才必超十倍伏願陛下暨廻慈眷俯察愚衷念蒼生之疲授能者之位即微臣無妨賢之愧大君有任用之明得公論於縉紳盡私誠於犬馬再以白首獲奉紫宸備一刻於周行實百生之榮耀前後陳乞煩黷聖聰雖懇迫之未申瞻軒墀之人已近不勝悽悽之至

同前

周行先

臣某言昨遣奏事官馬元宗附臣口奏請赴朝覲馬元宗廻奉宣進止語臣云君臣之情不厭相見朕與卿心無二緣途路稍遠卿來後即不免朕憂况乍收復洛州士庶恐未安泰須卿存恤未能遂卿此志且不須作來意者皇靈特降天語密開俯伏流汗殞越無地臣某中謝臣內顧庸虛謬居藩鎮日月云邁倏然三年空荷丘山之恩未申絲髮之効隳肝瀝膽豈盡愚誠從頂至踵皆承玄造夙夜祗惕悼心失圖誠願暫覩駕鸞之行獲倍羔鴈之列特近宸睠親奉德音則朝聞夕死臣之甚幸而軍城初復天意遙軫戀結之至尚抑懇誠今疆場無虞干戈已戢軍儲茂賦

幸有支持伏望天意許臣至冬末春初已來暫赴朝謁得
申犬馬之志庶盡葵藿之心碎首糜軀死之無恨云

代孔大夫乞一作請朝覲表

杜周士

臣某言臣以斗筭之資荷旄一作旌鉞之寄職兼千乘位一作

職物十聯而節制頒條曾無可紀妨賢專祿亦一作已四

年由是再陳表章備瀝哀一作懇誠在必達義無苟安伏

惟元和聖文神武法天應道皇帝陛下憂勤萬務砥礪庶

工服勞中外者有更踐之常受寄方隅者無專任之幸所

以俗用不變官稱得人坐致平治寔使均一天下幸甚天

下幸甚今輒冒犯嚴譴更陳丹悃不敢廣引遠事請以近

日一作言之至如揚於陵鄭細網馬物等或從偏鎮陟授或

自周行蒞事或三年獲歸或三考一作除替公議惟名

願亦伸伏乞聖慈平分許循往例賜停見職擇用群才則

聖代盛審官之規微臣無去國之歎無任禱祈之至

一作皆唐類表

崔中丞請朝覲表

憲宗

臣某言臣歷刺三州連物二府外任逾紀入覲無階就日

望雲魂飛心往臣其中謝伏惟睿聖文武皇帝陛下覆載

無私遐邇同致復昇平之故事繼前聖之高蹤中外踐更

出入迭用臣以虛薄叨受恩榮徒竭夙夜之心未伸朝夕

之敬天威咫尺誠寤寐而無違雲漢昭回固瞻仰而何及

是以前在朗寧封章累上及移臨松漠星紀屢周微衷尚

隔於戴盆積望徒懸於窺管葵藿之誠彌切犬馬之戀愈
深人欲天從於茲未驗下情上達終冀不誣敢黷宸嚴罄
陳丹懇伏乞賜臣除替許至闕庭厠蹈舞於群寮備班行
之散地足趨中禁目覩大明俾成九族之榮以盡百生之
幸非敢竊國賓五獻之禮希康侯三接之恩一覲龍顏萬
死爲足無任懇到迫切之至謹遣某官奉表陳乞以聞

李大夫請朝覲表

敬宗

裴度

集無

臣聞天道君也高而下濟地道臣也卑而上行上下交感
然後萬姓生焉庶政成焉其或蒼鬱不通則爲災沴之氣
必在宣達使之光明太平之風實繫於此伏惟文武大聖
廣孝皇帝洪覆品彙光宅寰區翺飛跂行皆得其所况臣

器識庸陋遭遇便藩始事憲宗過蒙驅策復事先帝猥加
爵命大恩無報終懼且慙以至今日又承寵寄消毫未効
齒髮將衰起在山南不遠旬服宴安厚利拜受軒階此則
爲君之道下濟有餘爲臣之道上行不足尸祿彌久心魂
若驚日往月來寢成憂塞伏希降鑒特許入覲冀得少謝
萬一使無壅情然後退歸里閭降避賢路雖則萬殞無恨
可謂百生之幸况李光顏薛平皆武臣也淮海以爲要重
然猶邈迤而至迷職明庭臣儒也梁漢無事道途孔邇
若泰然自安貪冒榮顯位爲公相衆所指名又何以表率
四方儀刑多士臣不勝傾心延首瞻系天衢之至

文苑英華卷第六百六

文苑英華卷第六百七

表五十五

雜上請一

請罷功臣襲封表一首

為于侍郎請向山陵表一首

請省自披讀表一首

請廢在官諸司捉錢令史表一首

請千牛不簡嫡庶表一首

為原州趙長史請為亡父度人表一首

為獨孤氏請陪昭陵合葬母表一首

為某官等請預陪告廟獻捷表一首

為汴州司馬唐授衣請預齊會表一首

文苑英華 卷一百一十七
為文武百官等請造神武碑頌表一首

為常將軍請上禮表一首

為盧從愿請替東都留守表一首

為群公請公除表一首

請罷功臣襲封表

長孫無忌

貞觀十一年令諸功臣世襲刺史錫之土宇以無忌為趙州刺史封趙國公都一十四人無忌與房玄齡等上表曰臣聞質文迭變皇王之跡有殊今古相沿致理之方乃革緬維三代習俗生一作靡常爰制五等隨時作教蓋由力不能制因而利之禮樂節文多非已出迨夫兩漢用矯前違置守頒條蠲除曩弊為益之大四字一作為無益之文單及萬方不

易之禮

四字一作建不易之禮

有逾千載今曲為臣等復此奄荒

其優降錫之茅社施于子孫永貽長世斯乃大鈞播物秋

毫

一作毫髮

並施其生小人踰分後世必嬰其禍何者違時易

務曲樹私恩謀及庶僕

一作僚

義非僉允方昭史冊之誦有

紊聖道之綱此其不可一也又臣智効罕施器識庸陋或

情緣右戚遂陟台階或顧

英華作願非

想披荆便蒙夜拜直當

今日忝

一作猶

愧非才重裂山河逾彰濫賞此其不可二也

又且孩童嗣職義乖師儉之方任以褰帷寧無製

一作傷

錦

之弊上于天憲彛典既有常科下擾生民必致餘殃於後

一挂刑網自取誅夷陛下深仁務延其世翻令勦絕誠有

可哀此其不可三也當今聖曆欽明求賢分政古稱良守

寄在共理此道之行一作非為日滋久因緣臣等忽有改張

封植兇曹失於求瘼百姓不辜一作幸將焉剛之此其不可

四也在茲一舉為損實多曉夕深思憂貫心髓所以披丹

上訴指事明心不敢浮詞同於矯飾伏願天澤諒茲一作其

愚款停其渙汗之澤一作旨賜其性命之恩

一作皆舊唐書本傳

為于侍郎類表作中請尚山陵表已見五百七十一卷上官儀

請省自披讀表 楮遂良

臣遂良言伏承風氣小動正進湯藥臣荷恩光不勝愁懼

既聞御膳平和一則以喜伏惟陛下異人者神明同人者

五情夫人之生以神為主神太用則虛刑太勞則倦有此

而不生疾者非所聞也陛下昔年力平寇亂及臨寶位憂

勞萬國龍荒沙漠何所不思情切於此無時懈怠遂令陛

下鬢鬢之早白又數年已來耽翫書史每作文詠兼諸手

筆日暮繼燭運心不停又誥朝與群臣論政數百千語音

若韶夏理同蘭玉若非辛勤何以得此且以天情愛好不

能自息臣愚誠恐陛下今猶看讀夫人年踰四十筋力漸

疲篤而不休更增疹疾然君以百姓為心百姓以君為命

君體平康天下安寧陛下已讀得之者用之不可盡已知

者當世不能踰伏願節諸言語且無披卷每減思慮微疴

自遣天下蒼生之所幸賴臣不勝區區謹敢表聞伏願無

覽臣之表遣傍人讀知臣意臣願足矣下愚之情伏深戰

戰

灼

請廢在官諸司捉錢令史表

前人

臣遂良言古稱君爲元首臣作股肱梁棟榱桷隨能助化所謂成海取乎細流崇山由乎積壤然則爲治之本在於擇人不正其原遂差千里周禮鄉大夫之職考士德行獻之于王王拜而受之登于天府漢家以明經拜職或四科辟召必擇器任使量才命官然則市井子孫不居官吏大唐制令憲章古昔商估之人亦不居官位陛下許諸司令史捉公廨本錢諸司取此色人號爲捉錢令史不簡性識寧論書藝但令身能估販家足貲財錄牒吏部便即依補大率人捉五十貫已下四十貫已上任居市肆恣其販易

月納利四千一年九輸五萬送利不違年滿授職然有國家者嘗笑漢世賣官今開北路頗類於此在京七十餘司相率司副九人更一二載後年別即有六百餘人輸錢授職伏惟陛下治致升平任賢爲政或太學高第或諸州進士皆策同片玉經若懸河奉先聖之格言慕昔賢之廉耻拔十取五量能授官然犯禁違公輒罹刑法况乎捉錢令史主於估販志意分毫之末耳目鄺肆之間輸錢於官以獲品秩在萬年歲陛下能不使用之乎此人習與性成慣於求利苟得無恥豈蹈廉隅使居其職何向而可將來之弊宜絕本源臣每周遊民間爲國視聽京師僚庶爰及外官異口同辭咸言不便臣無容靜嘿輕敢表聞伏願更

勅朝臣遺其詳錄輒煩聽覽伏深戰慄謹言此篇六百七十七卷重出

今已削去

請千牛不簡嫡庶表

前人

臣遂良言臣聞主祭祀之胤必資於嫡長擢文武之材無限於正庶故知求賢之務有異於承家前王制禮緣情斯極永嘉以來王塗不兢在於河北風俗頽乖以嫡待庶而若奴妻遇妾而如婢廢情虧禮轉相因習構怨於室取笑於朝莫能自悛死而無悔降及隋代斯流遂遠獨孤后罕睢鳩之德同乳鷄之晨普禁庶子不得入侍自始及末怨曠未弭聖朝御曆深革前弊人以才進不論嫡正自茲二紀多士如林今者簡千牛舍人方爲此制臣竊思審於理

未安何者母以子貴子不緣母也今以母非正室便言子

無貴仕則趙衰孕於越婢遙集

晉阮孚字遙集其母即胡婢

產於胡姬

田文枚臯皆妾子也文則播美於強齊臯則有聲於隆漢

未聞前載有所問然此類甚多備存史冊不敢煩引輕黷

宸嚴今反棄古實從近事以妬忌之政施明敷之日非徒

英雋交屈固亦兢端斯始王者設教務慎其源源流一開

爲弊必甚儻側室之子負才而不用君棄之於上家輕之

於下忠孝不展友愛無施如此等人豈不怨憤雖隔千牛

之選仍許三衛之官色類乃復稍殊捍禦至竟無別若惟

才是用人自甘心一彼一此異端斯起至於昨來檢括麤

人公孫武遠及崔仁師等見多是嫡子故知善惡由乎積

習邪正寧限嫡庶必然之理不言可明伏願更量可否還
遵昔制不使側室之胤有高才而被屈正妻之子雖至愚
而獲用則嫡庶於此分鑿諍訟無因發矣前選已了不可
更追乃今補闕猶得詳審臣蒙恩獎擢厠近司事有未安
豈敢自默謹以表奏伏增惶悚

爲原州趙長史請爲亡父度人表 王勃

臣某言臣聞奉忠履義帝業所資昭德報功王風是切臣
亡父故臣使持節都督豐州諸軍事豐州刺史上柱國南
康郡王士達徃因隨季預奉皇初于時元洛未清雙嶠尚
梗江淮海岳王公數十亡父身羈僞鄭寵極戎庭掃千載
之風雲擁三河之士馬情思奉順義不圖生綿越寇塲密

誠歎登太行而耀甲則建德離心出函谷而揚麾則
充破膽天書屢降手勅仍存洎乎九服乂安四方無事謀
臣出鎮猛將臨邊西窮赤水之源東究青丘之境橫戈北
塞盡沙漠之風塵授越南荒被牂犴之矢石義形夷險迹
遍疆場分閩淹榮懸車遂禮雖死於牖下實懷天子之恩
力盡方隅無愧忠臣之節今者歸藏有日先遠戒期陛下
德被遊魂惠流枯骨高班厚祿已極於生前列鼓鳴簫復
光於身后誠非毀滅所能投報但臣霜露之感瞻彼岸而
神銷烏烏之誠俯寒泉而思咽希開淨福庶補窮埏伏惟
陛下恢不次之恩錄無涯之請使獲從朝例賜許度人濟
魂一作沉識於昏塗拯亡靈於燬宅則陛下乾坤之施旣不

隔於幽明微臣蟻蟻之心豈忘情於家國是所圖也非敢望也輕黷冕旒若墜冰谷

爲獨孤氏請陪昭陵合葬母表 李嶠

妾獨孤氏言妾早罹艱罰終鮮急難門構傾頽宗緒斷絕零丁在疚微眇何依賴母氏劬勞顧存鞠撫漸離疋瘵以至成立犬馬含識烏烏有情空懷返哺豈曰能養枯鮮何幾隙駟不追擗地扣心仰天泣血應門乏五尺之嗣當室無三年之主衣衾之舉誰則始終奠酌所存實寄惇眇今日月斯邁龜策告期將安窀穸或從遷祔妾亡祖唐右衛大將軍溧陽縣公彥雲迹參締構功勒鼎彝亡父唐某州折衝都尉襲溧陽縣公臣某寵懋戎行嗣守藩服咸得託

墓喬岳陪瘞穀林杜氏階前雖云非古齊君牖下義彰昔儻家返魂舊塋合骨先壟則存歿榮幸幽明感戴妾百罹兼至六極備嘗雖送往飾終無資石槨之厚而傾家破產不瞻塗車之費先臣直茅舊封食菜遺業頒諸同族散在別房相彼誓河事憑先德永言書社宜奉太宗伏望哀此孤微惠以絲紉廻一歲之邑入助千齡之宅兆豈惟裒多益寡有叶典經固亦勸義篤親實允觀聽妾生輕歎塵地接葭苴承夏禹之致孝屬唐堯之敦叙荒情謬款輕敢上祈天造曲成儻蒙哀遂無任窮懇之至謹詣朝堂奉表以聞穢黷冕旒伏增戰越

爲某官等請預陪告廟獻捷表 前人

臣某等言臣某沐道昌期承榮休曆或叨恩獎擢謬隨州
縣之班或收拙罷歸行戢丘園之影徒懷闕庭之感終絕
雲霄之望不謂幽誠上達卑聽下臨太陽之暉遠鑒於傾
靡油雲之澤俯潤於織荆俱延鶴板之恩遂忝龍闈之召
雖秦君入夢暨喜登天晉士披心長祈捧日豈足方其榮
幸疋此歡泰今三軍凱入邊境廓清五室恭禋靈祇配享
介胄承策勲之禮衣冠陪執豆之儀萬辟同趨百蠻在列
有識搖心而竊抃含靈廓背而延頸臣等鞠躬天闕待命
帝閣馳心日於九霄障門庭於萬里企悚之志徘徊罔極
伏望俯垂矜察曲賜叅陪使得接影踰踰克鳥獸之前列
隨肩濟濟望夔龍之後塵則夕死朝聞有欣於服道千齡

一遇無憚於灰骨不任延佇企悚之至

為汴州司馬唐授衣請預齋會表 前人

臣某言臣母氏齒髮既衰風氣彌積寢興乖豫定省不安
陛下降視萬方俯矜一物哀老母虛羸之疾慙愚臣煎迫
之私弘以不匱之思布以非常之澤使得暫辭藩岳別梁
郡之檐帷旋赴京都求越人之砭石自班輿首路潘宅來
歸承厚蔭於四天接歡言於九族雖名一作醫久一作醫上藥研秘
術而未嘗而佩德感恩覺沉疴之半愈屬千齡啓旦十號
登樞演金石之微言呈玉毫之寶相三千國土俱傳貝葉
之文億萬天人並入蓮花之會臣六時空念五起未寧思
酬顧復之恩願假招提之福儻獲書名擅供厠影法筵聲

歸依廻向之心受清淨菩提之果實望三身覆育開梵帝
之仙坊十善護持發醫王之秘藏未離災厄長登福壽上
以祈龍象之深惠下以申鳥鳥之懇誠豈唯區區闔門獨
荷於仁覆故亦悠悠法界未覃於孝理不量淺薄敢輕上
祈塵黷威嚴伏增戰越臣某誠惶誠恐頓首頓首

為文武百僚等請造神武頌碑表 中宗 宋之間

臣某等聞行至公者莫先於發揮茂實垂不朽者不若於
刊紀洪名伏惟應天神聖皇帝陛下 一德披圖五精乘運
先天地而利用依鬼神以制法無思不服有感必通日者
變起心膺禍生肘腋弄兵指闕敢忘下濟之恩犯門斬關
遂激上靈之憤陛下近幸玄武傍顧紫微鳳翔而梟鏡失

龍見而鯨鯢就戮順天翊聖皇后配乾積德從帝居
佐莫大之英猷參非常之妙略親紆寶思式頌玄猷椒掖
之文久垂河漢其泉之石已入京都伏惟陛下卑奉聖躬
謙保神器惜其國用念彼人艱有命且停含靈失望臣等
容光壽域竊位明朝不蚕而衣無裨塵露不耕而食有負
靈祇陛下寢有道之豐碑臣等享無功之厚載 一作 亭育
雖廣何所自容且天惠不可以闕書神功不可以久寂臣
等請各減所俸以勒殊休庶同子來成之匪日無任光開
一作 文闕 垂裕之至

為常將軍請上禮表 崔融

此篇當在六百十三卷上禮門今已移入姑存其目

文苑英華
卷六百七
為盧從愿請替東都留守表

臣某言臣才輕位重効淺恩深鸞駕西巡猥忝居守違離
罕畢進退門闌感戀惟深負乘是懼臣某中謝臣初辭之
日伏奉德音限以周年許遵舊例推延在苒星歲丹環夕
惕屏營日月以冀葵藿傾葉豈望廻光犬馬有心常懷戀
主顧循卑鄙未敢上聞伏承今孟冬有事陵廟慶章覃於
四海國禮盛於百王伏念漢臣彌嗟留滯預逢舜后願侍
宗禋瞻望之情倍百恒品且三川朝市四塞關河論都抗
於西賓作鎮雄於東夏倉儲猶在邦政孔殷臣亦何人久
新重任不勝控款兢惶之云土謹奉表附驛以聞伏乞俯矜
誠請更擇親賢不棄草茅之微終奉綸綍之委

為群臣請公除表

蘇頌

此篇當在五百七十一卷遷祔門今已移入姑存其
目

文苑英華卷第六百八

表五十六

雜上請二

將加神龍尊號群官請公除表一首

為崔冀公請赴山陵表一首

為宰相請不停千秋節宴會表一首

請入湯表一首

代郭令公請雪裴僕射表一首

為衛尉許卿請番男表一首

為人請合祔表一首

為崔僕射請第寬當元載累表一首

為郭令公請授四節度大使及五府大都督表一首

安西請衣賜表一首

請置兩省官表一首

為趙侍郎乞歸河中侍兄表一首

為王相公請改六書表一首

為河東副元帥馬司徒請刻御製箴銘碑表一首

為中書門下請追尊號表一首

中書省請冊皇后表一首

史館王相公請冊淑妃何氏為皇后表一首

將加神龍尊號群官請公除表 蘇頌

此篇當在五百七十一卷廷祔門今已移入姑存其

目

為崔冀公請赴山陵表 已見五百七十一卷 于公異

為宰相請不停千秋節宴會表 玄宗 孫逖

臣等伏見太常卿常縉奏稱京兆韓朝宗面承進止云若

更不雨即停作千秋節者臣等伏以千秋令節萬壽良辰

上以答皇天啓聖之休下以展蒼生務農之望禮白帝賽

田神著在典式久通誠感陛下以經旬不雨憂人軫念有

阻群情將停盛德 疑 勤恤之旨被物以深而祈報之歡於

義難間况近城郊旬雖以憊陽自餘郡縣頻霑澤今自

東京起居使魏方進至臣等親問方進云自陝以東數日

一雨秋稼滋茂特異常年此則萬庾可期三農無害近郊

之內雖未霑霈率土之濱已知豐衍太平令典豈可闕如

又數年以來此禮頽廢臣子之地獻壽無因朝野之情多歡莫展特希天鑒俯暢人心

請入湯表

常袞

臣袞言臣先患腰膝此成積疾自從趨侍漸覺痊除每屬陰寒即微發動近加秋冷轉不支持半身風痺右足拘急謂其冷甚因以熱攻遂覺頭旋兼之眼暗寒溫相觸調息實難伏蒙聖慈特賜醫藥殊造至深灰粉訓恩未申萬一生成之功雖則頓瘳積久之癥固難速効沉綿增劇憂懼失圖先因入湯常愈斯疾漸逼冬候今正其時伏望天恩許臣就湯將息駕駘蹇步冀効驅馳螻蟻微誠庶廻昭鑒無任懇迫之至謹奉表陳乞以聞

代郭令公請雪裴僕射表

代宗

邵說 大曆中

臣某言臣聞忠邪不可以並立善惡不可以同群共任宰嚭而伍胥鳴夷楚任斬尚而屈原放逐遠惟前事孰不痛心伏見澧州刺史裴冕明允忠肅道高德厚匪躬無怠有謗之風首佐先帝驅馳靈武贊雲雷之業成社稷之勲程元振忌其直道方遂加誣構謫荒裔天下稱冤空

懷醜正之悲莫雪盜憎之耻今姦邪屏退聖政文明百度惟貞四門已穆而寰海之內元元之人莫不延首德音思聞至化伏願特令追亮列在朝廷俾之台座端揆庶僚平章百姓處訐謨之任當燮理之權必能叶和萬邦致君堯舜臣位兼將相職忝股肱竊思賢傑共熙帝載無任懇迫

文苑英華 卷一百八
之至

爲衛尉許卿請留男表

于邵

臣某言臣男某官某頃年二十一二因外人招誘性乏天和臣又拙訓遂交遊非類妄用錢物臣恐滋蔓累及家私臣某年任寧州刺史表請積西効力離鄉別親庶其思過臣遽流竄比屬艱難遐荒萬里分爲阻絕近節度使差奏軍事會臣待罪輦轂重與相見至京以來臣竊窺察誘其由衷似辦君親近於觀志屢申懇倒願留晨昏夫物感人情况兹天屬苟及於此惕然關心臣今齒髮衰暮唯生此子倘其改行家有所傳九原之下可以塞責臣昨詢問積西職掌殊非要重伏乞聖慈迴鑒許爲父子如初便留

東軍與叔冀逐急征討盡其武用或樹功勳王事不
林殘寇又切臣得地近時復知聞縱其不賢猶可備
臣之幸至微至賤輕黷宸嚴覬冒之求戰越無地

爲人請合柎表

前人

臣某言臣固不肖寵由父任累荷朝獎非臣本才永惟筮仕之初濫觴有地感舊恩愛竊係于心故開府儀同三司無太常卿李承光頃充河西兵馬使天寶年中錄臣帳下自兹效用得列戎班出入五涼艱勤一紀風雨寒暑未嘗廢離俄屬幽燕作逆伊洛陷寇蒲潼不關天地交閉承光臨計自失倉卒西還亦既通表華陽奉牋靈武枕干待命俟期而往曾未信宿先朝賜書敦叙兄弟如家人禮當是

時也臣親見之開緘涕流是日復發及至行在特加天下
兵馬副元帥改名匡國扈蹕彭原別承誥旨因此伏法當
瘞朔陸身雖受刑家免拏戮遽蒙昭雪發使宣恩特令安
存葬日官給今長男願見克鎮西副將次子諤又知覃懷
兵馬女婿周鼎分閩河西咸受綠車之榮並爲白馬之將
聖朝寵寄洎男及女臣謂匡國雖死猶生近以孀妻告終
願從合祔諤等銜血無由上陳將傳銘誄未正官爵且匡
國非禁人收視之責微臣當故吏願言之時輒冒宸聰乞
從優贈縱前封尚在詎敢追榮倘後命有加方期復魄則
衛青有時將葬而纒布不負一言黃泉有知毋慊斯在無
任懇款求哀之至謹詣某門奉表陳乞以聞

爲崔僕射請第寬當元載累表 前人

臣寧言伏見詔命以中書侍郎元載贖貨無厭姦邪迹露
國有明憲已寘嚴科臣第御史中丞寬頃緣長春宮事蒙
恩克載判官今罪累所加寬亦合從譴責念其愚直懼此
禍階每荷聖朝獎拔之私累忝中臺精選之務因逾所効
寵貴當時上答之期分知死所臣忝骨肉之分休感是均
夙夜震驚反側難措朝典輕重不爲微臣伏乞聖恩無以
私貸伏增惶懼之至謹遣某官某奉表請罪以聞

爲郭令公請授四節度大使及五府大都督表

王諫

臣某言皇太子若王之枝葉固當使之繁茂以蔭本根國

家自頃以來率由此道莫不重其職任以維四方如朔方
范陽河南隴右劍南等州節度大使并五府大都督一切
並用皇子以相監統內以制姦宄外以威寇戎雖未合封
建舊章亦所以廣維城盤石之義也自羯胡肆逆海內糜
沸務求武將授以兵權於是大使大都督之職廢而不復
用矣近日僕固瑒梟夷之後陛下以朔方巨鎮寇逆未平
將授其使賜臣靈州大都督單于安西大都護朔方節度
使此一時之事非經久之術今妖氛電掃中外小康忝職
樞衡代天理物固合遵守舊典宣明國章豈可復竊大名
紊亂常式此臣所以內懷冰炭俛仰增慙伏乞選之親王
授以斯任俾臣兼靈州長史及副大都護節度大使佐理
其中并諸府節度亦望準此處置四夷聞親王分鎮必當
遠近畏威將亦絕其覲心不敢妄動又大元帥頃者並無
親王爲之自皇太子冊在春宮遂罷斯職今但置元帥司
馬而元帥未有其人四方將帥之臣無所稟命亦望陛下
復授皇太子以振兵威此國家要務也臣前月已具聞奏
陳其事猶懼陛下未察愚言不以爲念是以敢再三抵冒
昧死上陳倘允臣所祈天下幸甚無任懇願之至

安西請衣賜表

臣奉某月日勅令臣河西揀招五千人赴磧西逐面防捍
者臣到西安之日安西早以翻營軍令有行困不敢息鉄
衣不解吹角便行邊庭路長去去彌遠往還三萬里辛苦

二周年朝行雪山暮宿水澗溪深路細水麤

大約一

程少亦百渡人膚皴裂道上血流畜蹄穿阻

才與切行不進也路

傍骨積征馬被甲塞草不肥戰士戎衣胡風盡化今邊秋

早冷赤肉迎霜臣準勅放還實恐磧途凍死伏惟矜慈育

物遠念單寒請令安西給付綿帛蓋其凍露路免疆

疑作僵

屍生入鉄門死將不朽

請置兩省官表

權德輿

臣德輿言臣聞堯之為君也百工允釐舜之官人也九德

咸事伏惟陛下文明御寓建用大中德厚侔於

集無於字二儀

利澤施及

集無及字

四海中外庶政寢興求思舉一事必稽於禮法命一官必詢其望實故朝無虛授時絕幸人厲精萬

權超冠前古可封之俗比屋相歡詩曰嗟我懷人宜彼風

行言思其才也又曰翹翹錯薪言割其楚言選於衆也蓋

在旌別能否循責功實以爵祿為砥礪以群才為鋒刃則

舉不失職人効其能左右掖垣首承詔命奉行詳覆各有

攸司然後下於中臺頒於海內誠至重也彌綸政事侍奉

軒墀分曹十員今則殆絕昔衛多君子晉有卿材况巍巍

聖朝淳化所被濟濟多士豈謝古人要重之司曠闕既久

則事有所壅吏得為非亦慮四方聞知謂朝廷之士事關

理道豈止官常臣以凡庸過蒙慈渥塵汗清近超

集作逾越

等倫前後對敷備承獎飾德音顧問魂爽震驚而朴訥

微不能自達又去四月三日面奉進止令臣有所見即條

文苑英華 卷之百一
疏奏來者輒以愚管手疏上陳集作干黷宸嚴伏待罪責
無任兢懼殞越之至謹奉表以聞

為趙侍郎乞歸河中侍兄表

臣某言臣私門積蒙幼集荼蓼賴諸兄訓育得漸有成比
登官序各限中外聚居則少離別則多類表作為兄薰頃

任河中少尹先因風痺成疾手足不理于今累年中間迎

到上都類表臣自躬親方藥兄以粉榆松檟盡在河東懷

土之心暫來輒去近從數月頗益沉綿形貌支離言詞蹇

澁甥姪數輩年盡兒童雖在左右未能侍類表養欲重迎

至此在兄則羸瘵難堪將馳往近關顧臣為官守所繫魂

銷氣索志往形留百憂攢心動失次第伏以聖慈濟育至

德潛通肖翹之倫名遂其性特乞罷臣所職許以還鄉倘
得數歲侍兄必冀沉疴有間然後星言匍匐稽首闕庭臣
之至願於斯萬足無任懇願迫切之至

為王相公請改六書表武台

臣某言臣聞兩儀定位法象必在於區分百物正名稱謂
不可以相奪然則當至公之運勿用於權處大朴之辰宜
循其本臣竊見周官保氏教國子六書一曰指事二曰象
形三曰諧聲四曰會意五曰轉注六曰假借夫假借者謂
本無其字假用音者也昔伏羲氏仰觀法於天俯觀法於
地爰造書契是生文籍夫書者著也篆者備也所以昭著
誓言傳之不朽推意結字斷天下之疑垂萌示象紀天下

之德安可穿鑿音韻假濫言詞者哉自史籀篇亡李斯簡
脫古文有數物類難周雖魯恭王壞孔子之宅河內女子
毀老聃之家而屋壁之餘門庭蓋歎敬侯所寫凋訛於正
始之間汲冢所開散落於太原之際由是後儒晚學苦音
訓之繁耆生故老嗟異同之雜下蕪案牘旁泊質劑聽受
施行莫能見曉規摹典憲於何取則不有釐改孰導群疑
當今受神冊鑄寶鼎封禪之隆固將九皇比德文章之盛
豈直三代同風百官以理萬人以察臣此一作伏見御筆
前後所製新字等神功開合天地盤旋於筆端玄造運行
日月相望於紙上王牒石記無以校其幽深河圖洛書不
能方其麗則臣幸承皇訓親沐聖酌窺東國一札之文奉

西京七言之詠劉德之陳雅樂雖未澄心劉儻一作之學

史書頗嘗遊目輒欲循環音旨罄竭蒙情凡所借音並加
新字將令分有一定無汨於源流理或萬殊各隨其事業
以此化俗佇微益於毫釐以此教人儻不虧於影響伏乞
上玄卑聽至道曲成矜此庸愚肅然聽許臣即望以類撰
綴隨了進呈輕觸冕旒不勝惶惕之至

為河東副元帥馬司徒請刻御製箴銘碑表 德宗

臣燧言臣前竊睹御製賜靈鹽節度使杜希全君臣箴一
篇輒請刻石於太原興王之都與玄宗所製起義堂頌碑
並列垂訓後代光示萬邦伏奉批表及賜臣等手詔俯蒙
允許仍賜臣一本又賜臣御製宸臺台衡銘二首并叙精

義微言深于義文之旨明訓大誠叶于舜禹之暮涵類表作函

周詩而軼商頌準天地而懸日月五彩彰施而溢目八音

均調以動心至於上下咸和君臣交儆僻邪無自而入猜

害不萌於中鬱堙底伏之氣宣強悍類表作儉巧讒諛之說泯

援申甫以作誠紹唐虞而追蹤誠文教之極而至治唐諱之

本也臣餘生陋質材朽功微陛下獎勵過深寵錫逾厚使

得獲睹殊觀接聞至音日以勲賢稱其威武跪捧震駭顧

循悚忤實願周旋奉戴內以為子孫藏恢演昭宣外以垂

金石刻今者琢磨已就刊勒方施至於類表作其次序篇章論

載年月未敢即定謹令圖畫進上仍請於碑首正面刻類表

刊作御製箴銘四字其下刻年號月日字建箴銘二首元

序其碑首陰面伏請準起義堂頌碑例刻年號月日字建

其下刻臣所上表疏伏蒙批表勅語及所賜臣手詔庶使

後之觀者尋其并連究其本末以知盛德之事懿鑠丕顯

游揚無極臣之所願也不勝忻懼惓懇之至謹遣某官臣

某奉表以聞臣誠懽誠喜頓首頓首謹言

為中書門下請追尊號表宣宗杜牧

臣某等言伏以收復河湟廓開土宇北絕梓嶺西過榆溪

壯中夏起塞之雄奪西戎理弓之地至使強虜不敢觸鋒

山鎖七關地闢千里歌狸首而息射詠杖杜以勞旋聖德

神功超今越古某月日臣某等於延英殿面奉德音陛下

以克定舊疆獲成先志歸功祖考追尊鴻名臣等伏念國

家之為理也溢三皇之軌躅奮百代之上下天寶之末天

下大集作泰寧恃富貴集作庶而醉飽非集作無虞韜干戈而兇

逆僭作大曆貞元之際河北河南之地朝廷行姑息之政

郡國皆叛亂之臣苟且之令行畫一之法廢日增月長雄

昌雌和李錡宗子劉闢書生東據石頭西斷劔閣朝廷所

有唯止西京伏惟憲宗皇帝順上帝之心酌列聖之法爵

不踰德集作等舉不失賢親端莊之正人去側媚之邪士集作

親莊正之人去側媚之士然後提挈綱紀震疊雷霆誅夷群兇洒掃四

海百度如律九功可歌天豈示益張聖統無極詩曰惠我無

疆子孫保之復曰周雖舊邦其命維新伏惟元和之初集作

功實開中興之業伏惟聖敬文思和武光孝皇帝陛下修

先王之大道行天下之遠德廣問延諫褒直盡下首雪冤

獄常對法官是集作則字虞舜卹刑文王慎罰無以過也開張

聰明延納諫諍守職業者無職不舉被言責者無事不言

皆獲甄昇豈惟假借夫仲尼以三人有我師大禹以愚夫

能勝予是仲尼之好問大禹之拜言無以過也是以百姓

手足皆安於錯置四海風俗益臻於和平尚猶子集作午夜

觀書日昃聽政下採人病上求天端帝典曰聖敬日躋湯

銘曰日日新是誠集無誠字陛下之德有以方之集作過之仲尼曰

禹立三年百姓以仁遂仰陛下之至理知孔聖之可驗矣

西戎強盛自古無之包有引弓之人盡臣集作為跨馬之國

天下獻力備邊不克四海輸賦養兵不足廣川薦草盡為

所有健兵倅馬不可當峰雖李廣材能充國沉勇但能閉

壁集作豈敢交綏伏惟聖敬文思和武光孝皇帝陛下畜

眷筭於雲集作漢之表畫聖謀於造化之先捕虜將軍射

聲校尉羽林突陣之騎酒泉校尉集作之兵親自指蹤同

時受命信星効祉靈旗呈祥壁壘言言而洞開渠魁集作

以集作自縛解辯削衽投戈委弓懾怛威靈懽呼冠帶破

種徙域空漠淨邊指北海而封燕然中西域而立幕府鄭

吉之理烏壘班超之鎮他乾大庇生人一寬天下昔漢武

帝之逐北虜四海耗半殷高宗之代鬼方三年乃克尚書

班史稱德詠功今陛下用仁義為干戈以恩信為疆場所

求必至有開必先不遺一矢不頓一刃洗八聖迴首集作

之懷刷百年亡地之羞小雅盡興大業無極為而不有歸

功先帝禮曰天子有善上讓于天仲尼曰武王周公其達

孝乎蓋以善於繼述能光祖考今者陛下謙讓之道符於

禮經繼述之孝稱於孔聖臣等待罪宰相目覩昇平謹具

太常追尊順宗皇帝憲宗皇帝謚號如前伏候集作勅旨

尚書易高宗代鬼方今云尚書得非通稱上古或逸書乎

中書省請冊皇后表 錢珣

臣某等言伏聞禮云男正位于外女正位于內乃欲承天

休正人紀事宗廟奉蒸嘗是以詩有關雎貫三百篇之首

用以佐天下而正夫婦乃政之所由興也伏以聖唐積仁

累德列聖重光莫不師古以訓人弘禮以敦本遂得九垓

從化萬國用康曩者彝倫稍憊王道微缺使龍樓曠主嚙
之位翟衣闕助祭之規則外和而國安內和而家理安得
而致也必將有以待之伏惟陛下續列聖之洪業恢百王
之令圖爰建東宮再振墜典凡居寰海莫不忻歡百辟庶
臣所懷尚憚蓋以中壺之位未立六宮之政未崇臣案天
極四星一爲正妃上天垂象不可虐其應伏聞淑妃某氏
以坤厚之性母範有融淑懿之姿光乎內理用能誕生哲
嗣克當天心竊願陛下思落大猷仰弘丕訓淑妃某氏特
依故事冊爲皇后使六宮之內一以遵承所爲王政之所
由興而風化天下臣等位叨近密職在絲綸朝廷舊章合
有論請上期聖造特賜允從輕冒宸嚴無任恐戰之至

史館王相公請冊淑妃何氏爲皇后表 前人

臣某言臣聞乾坤相配所以全覆載之功日月相隨所以
明照臨之道惟王建后惟后助王若乾坤相配以成功若
日月相隨而行道古皇有制歷代皆然伏惟皇帝陛下法
天作聖引古爲師興邦則啓於聰明爲禮必循於先哲然
則中宮久曠陰教罔修伏自累朝遂同廢典四海絕仰觀
之表九嬪無所統之尊誰詠國風空垂易象永惟委墜可
謂因循漢氏以來舊章不易常先立后始可建儲今元良
已視於東朝而柔順未臨於內職既虛正位莫叙大倫臣
等每奉清光累陳彝憲竊詳睿旨俯鑒愚衷請問守龜必
當告吉掖庭累行詎無白鷺之徵簡策正名宜受金螭之

錫是以敢干旒宸進拜封章伏乞申命有司擇定良日俾行盛禮自叶至公冒曠宸衷臣等無任懇迫惶恐之至

文苑英華卷第六百八

文苑英華卷第六百九

表五十七

雜上請三

爲崔大夫請入奏表二首

爲劔南西川崔僕射再請入朝表一首

爲益州父老請攝司馬鄧公爲直表一首

爲益州父老請留史司馬表一首

爲益州父老請留博陵王表一首

爲公卿請復常膳表一首

中書門下請進膳表一首

災惑退舍宰相請復常膳表一首

爲宗正卿請復常膳表一首

爲鳳翔李尚書請使人拜掃表一首

代河南裴尹請拜掃表一首

請河北遭旱澇州準式折免表一首

代人至渭南縣降服請罪表一首

代人奉御批不許請罪謝恩表一首

駕幸長安起居表一首

代人行在起居表一首

代張侍郎起居表一首

爲崔大夫請入奏表

李舟

臣某言臣以久遠闕庭歲請朝覲在宣州日伏奉德音且以河南用兵許臣事平入奏尋蒙寵命移鎮浙東臣自至

越州旋經歲序瞻戀宸極道路轉遙俯察微躬疾病加劇實慮溘先朝露未謝明時昨者隨表便行冀蒙聖恩昭許續奉進止所在令廻伏迫宸嚴不敢冒進臣防身寡智處衆多尤但恐譴謗之聲日聞天聽浸潤之漸將廻聖慈憂疹相并死亡無日臣管州郡幸無逋懸西河之間又已寧靜伏願陛下察臣誠懇許臣朝謁實冀犬馬之疾歸上國而觸除風波之言仰皇明而昭鑒無任懇迫之至

同前

前人

臣某言臣一昨初承國哀號慕罔極已陳哀懇請赴山陵伏奉批答上遵違旨不許奔會玄宮甫閉攀扈無由未惟舊恩實延巨痛陛下自登寶位日月重光百靈昭蘇萬物

咸覩臣限所守僻在海隅遐瞻闕庭未獲稱慶陛下湛恩
兩施大號風行繁徃頓除窮海知化臣管內州郡幸獲安
帖在臣使務必由常規將臨元會之期倍切朝宗之戀伏
願許臣暫趨天闕獲覲龍顏集稟命於聖君退宣風於遐
壤臣死生無恨榮願之至

爲劔南西川崔僕射再請入朝表 于邵

臣某言去冬臣知衙事官姚悟廻伏奉手詔許臣入朝臣
自西川一作山軍還理裝撰吉與監軍使孟游仙等以今月
五日發成都十二日至綿州羅江縣中使馬承債至又奉
恩旨令臣與遊仙等却廻臣久辭闕庭從事邊塞思一朝
覲如天無階忽遂此行神道所感豈知中路猶阻懇誠

涕慙對於三軍結戀詎同於他日臣所行意實不謀身一

欲辯折讒

一作戎

間兼欲歎陳國要有不可形之翰墨有不

可傳之外人表臣心切唯天而已將士等知臣悃歎共憂
家國見臣不行魂氣俱喪臣以迫於所務抱恨南邊固請
監軍使行猶期上訴雖一夫阻命而違衆實難遊仙今於
漢州便發以從諸將之請軍中務要悉以咨之伏乞聖聰
俯遂群議則冀上輯下睦永無外虞西南艱危再沐清晏
豈臣獨夫之幸實克萬人之幸無任懇迫屏營之至謹附
監軍使孟遊仙奉表陳請以聞

益州父老請攝司馬鄧公爲真表 問丘均

臣聞天工人代安危所存得其情則風化淳厚失其性則

文苑英華 卷一百一十五
昨庶流離臣等本部益州司馬臣某雅慮忠純貞心剛克
通識人理博綜古言州無牧伯居攝端右靜以鎮撫物情
功乃隱於視聽事益於國家故不可一二而言也臣又聞
寇恂為郡甚得人心將拜汝南百姓遮道漢皇如請竟留
一歲敢緣斯義上犯天顏伏乞陛下憫垂涕之慈惠黎民
之願即其所守除以為真使生人無惜去之嗟孤貧有求
緩之賴則上下咸得中和可期伏表上祈以驚以震云云

此篇元編在五百七十八卷辭讓門今移入於此

為益州父老請留史司馬表 前人

益州大都督府草莽臣某等若干人謹冒死言臣聞理有
所藉穎州重覩於黃霸惜其不可河南一借於寇恂古之

恩迹今亦宜有臣等出身草莽茂育玄德并飲田食齒者
年衰安全家道傾疑遂天性皆賴陛下聖情恩利惠及蒼
生擇循吏以共康官賢才而俾牧者也臣州佐某官英明
興疑氣忠志居心該舉墳典猶協文史克美價於一省著
能聲於邦國緹油至止光輔藩維體要而庶政必凝憂勤
而自公知退伏見今日日除節彭州刺史璽函適到熊軾
將登吏人傳聞驚嗟相惜臣聞天地之道每從人欲帝王
之義必順人心所以黎庶安寧上下提福今此百姓乞留
一年庶得服習其教而易安優柔其道而日得聞闔天遠
上祈猶難伏乞聖慈回睠殊渙中留停已出之旨復如初
之望使祈一作折心重至驚魂還歸時兩一霑同養萬物無

在瞻望佇迴之至

益州父老請留博陵王表

前人

臣某言臣伏見陛下睿圖興復寶命維新救寓縣於貼危拯蒼生於塗炭凡在戴髮執不幸甚蜀鄉財產古稱天府疲弊始西軍之役屢空拯疑冒賄之夫滿路吁嗟棄親亡散維貸是視愛養誰能陛下所以惠賜藩王鎮撫梁益因之傳一作傳利期以政成而玄晞至止纔移弦朔除替旋聞臨筵不暖陛下與而奪之勾萌未達於方春濟舟忽度於中水天下何謂亡疑此哀憐今者百姓甚性一作情於官人貪富疑作留玄晞師恩斯弊遂革美其風而不見其好移其政而不失其宜且益州者列岳之雄望玄晞者朝廷

之忠良明使是推能術尤急理以才名相副義與隨時不乖陛下何惜一賢以遺百姓特望俯迴授受留借期年歷懇上陳馳情無地瞻帝闈而遐叫佇天睠而西流獲遂丹誠戴恩瞑目無任悃欵屏營之至

為公卿請復常膳第二表

臣某等言前以減膳日久憂損聖躬率土迴惶輕陳管見而孝情凝邈猶未俯同誠不感天增其履薄臣聞先王垂教以禮制情聖人無心以身從物故能上安七廟下字兆民唐諱所以孝治唐諱莫非斯道伏惟陛下率由過禮至性光前想終身之憂懷茹荼之酷愆子卯之制淹晦朔之期生靈皆所不堪聖體必將勞頓貽臣子之危懼忘社稷之晏

虞緬善靡達

一作緬
茲一善

方招兩失求諸典故兼且未安詢及

普天孰云其可既守高祖之天下為萬國之歡心先當愛
身以寧宗社無宜獨善用杜衆情伏願俯順禮經仰廻天
眷則群臣荷賴庶品咸康不任懇切之至

中書門下請進膳表

常衮

臣某言伏奉以華陽公主攝和稍類表作小乖思念所切齋宮
親禱輟膳終朝臣等下情不遑寸刻竊以經時之疾變節
或加分至所臨悔明異狀漸過其後旋即如初頃嘗驗之
多亦然矣陛下以海內之衆子育寧殊豈天屬之間皇慈
獨軫伏願忘懷澹慮常膳以時保安聖躬用慰臣下屬茲
煩暑尤切懇誠謹奉表陳露以聞無任兢惶迫切之至

熒惑退舍宰相請復常膳表

錢珣

臣某等言今月某日伏奉批詔以臣累陳列宿之間熒惑
退舍所宜升臨正殿進復常羞而睿聽彌高群誠莫遂顧
台星之有位居公府以不遑伏惟陛下道合秉陽事皆師
古稟天明於垂象察時變以側身克示允恭未忘戒懼考
乎經籍實契規摹雖退就卑宮儉惟降食方期應感合舉
典燹然而芒角既收運行已順歷懇亦循於故實拜章敢
惑於聰明而玄鑒未開丹心如燭鋪陳無序裨贊失圖伏
以大配乾坤重承宗廟執禮必遺於小者推誠皆可以貫
之則行正道以臨萬邦不在乎不居法座也布王澤而滋
庶物不在乎不食重味也而陛下未嘗不行正道於遐邇

布王澤於細微苟行之有終弘之不已則天惟輔德心實
彌災視棟宇而自安御亘邇而何爽敢祈聖鑒必念斯言
伏惟俯徇愚誠特允所奏十冒旒宸臣無任

爲宗正卿請復常膳表

前人

臣某等言今月某日伏奉批詔以臣所請復常膳御正殿
未賜允許者臣等恭承詔旨竊仰聖謀以爲前史所垂正
言可取則應天動人之事實哲王致理之先然臣伏思陛
下繼體以來推誠必至友愛之道顯教萬方惻隱之心罔
遺一物於王師致討司寇用刑率皆毒被蒸人罪與衆怒
救殘雪之極弊懲悖亂之元兇而後効順立功報之爵祿
勞心焦思痛在瘡痍屢降德音勤行王道得非應天以實

而動人以行哉况謫見之後戒懼不遑朝野所知星辰所
照則大官進御路寢燕居既舉舊章將踰期月固可以特
開睿鑒俯徇群心理且叶於至公事兼存於大體臣某等
謬居宗緒敢貢飾詞盡布腹心復干宸宸無任仰望兢越
屏營之至

爲鳳翔李尚書請使人拜掃表 翰栩

臣某言臣聞子之能仕父教之忠臣仕雖無聞忠冀盡力
當陛下至理之日偶四方無事之時臣幸揚名清朝全節
聖代於臣之分榮感多焉而罔極之心未遑省告伏以先
臣墳墓遠在定州道路所經瞻馳靡及臣自入宿衛三十
四年頃者師旅雖寧武臣分闡臣職叨禁近事絕私情弘

覆之德靡所不容而兢懼之誠實自難處空懷怵惕之感莫申展奠之儀今寰宇廓清憂疑必釋當天下交泰之際是人神叶吉之期臣寄重藩維不合上請今遣弟某官某專拜掃以道途所近便取北路赴定州輒披懇誠無任兢惶云

代河南裴尹請拜掃表

令狐楚

臣某言臣聞天地之大曲成於品物臣子之心無隱於君父下情上達至化旁流伏惟開元天寶聖文神武應道皇帝陛下睿謀作聖孝理奉天蒼生之願不違皇極之慈廣運不以臣微劣無取累擢大官位高尹京職重居守犬馬陳力未酬明主之恩霜露感懷遽有私家之請臣某中謝

先臣墳墓俯在近郊頃歲以來闕伸拜掃每至寒節展情禮晨往暮還所職無闕又臣於墳塋立碑恐其向就建樹之際獲遂躬親重泉承日月之光舉宗蒙雨露之澤不勝罔極之至

請河北遭旱澇州準式折免表 張廷珪

臣廷珪言伏見景龍二年三月十一日勅河南北桑蠶倍多風土異宜租庸須別自今以後河南河北蚕熟依限即輸庸調秋苗若損唯令折租乃為常式者臣聞皇天無私覆后土無私載日月無私鑒陰陽無私毓是以明王聖帝則而像之慶浹萬邦政敷一德故書曰無偏無黨王道蕩蕩無反無側王道正直伏惟聖朝御曆皇極在人正朔所

覃率土奉若百年于茲矣頃於災歲重賦饑人頓革彝典
特開變例雖施蠻貊之邦臣愚猶知不可况此兩道枕倚
大河南接神州北通天邑郡縣雄劇人物昌阜既類股肱
之地尤宜得其放心豈可殊其土風異其徭賦不恤災患
而殫其財力者即以桑蠶別加徵稅至如隴右百姓羊馬
是資山南諸州椒漆為利其或銅錫鉛錯貨自巖通蜃蛤
魚鹽財自海殖土物惟性錯貢四字一作惟錯方隅咸有澇年並
無他稅旱歲各準常規豈獨斯人外之王度且天災所降
年穀莫登在於貧弱或至殍殣生理既其難恃人心固未
易安就其憂危載空杼軸窮斯濫矣將無不至臣效官類
服在河南每見部人衆稱冤苦伏思景龍之際時多賊臣

有若宗楚客紀處訥武延秀常温等蔽虧日月專擅威權
各食封遍河南河北屬當水旱屢致蠲除因而遂矯制命
固非先朝之本意也伏願陛下廣天成之德均子育之愛
式崇大體追復舊章許河南河北有水旱處依貞觀末徵
故事一準令式折免則在蒼生不勝幸甚謹因所部法司
叅軍鄭玄亮奏澇損謹附表以聞

代人至渭南縣降服請罪表

韓翊

臣某言臣自出邊鄙素無才術頃因寇難累効驅馳遂荷
殊私謬膺重寄介於偏僻密邇寇讐備歷艱危得全節義
遼陽移拔趙北掃除皆伏威靈非臣力致幸逢清廓輒自
寬閑麾下不虞冊中生變坐移疑作貽顛沛實愧無謀縱欲

粉身於何塞責陛下念臣微効未即書刑許歸朝廷俾露誠懇王畿日近聖問存臨雖承雨露恩深其若丘山罪重闕庭進對臣亦胡顏缺鉞就誅甘當碎首謹於路側降服而囚且十年以來秉戎律者其於綏撫或有乖方不待刑章弊於部曲隱而不數斯輩亦多臣以負罪雖同免罹其禍幸全罽領伏俟天誅臣之為榮死亦不朽臣無任懇款之至

代人奉御批不許請罪謝恩表 前人

臣某言奏事官蘇翼迴伏奉聖造答表勒臣即復章綬速赴闕庭捧讀震驚心魂爽越臣其中謝臣智謝統戎罪深負國奉期死所翻荷生成恩承主偏法為臣屈迴謝九原

之路仰銜再造之功拜命之初不勝抃躍臣即匍匐拜謝

闕庭無任感戴云云

駕幸長安起居表武后時

富嘉謨

臣某言伏奉車駕以今月二十二日西至長安臣聞咸秦輿壤河洛舊區王者是宅因時順動故睿情載佇西睠邦土玉軻金根天旋雲被皇輿凱入在藻知歸臣忝葭莩謬膺垣翰尹京靡託陪鑿遂阻紫宸漸遙丹雘空積伏惟邇寒在候輦路透迤法駕就蹕聖躬多祐然後闢天陛而臨舊都巡卜征而考元吉者也無任悅豫之至謹遣某官奉表以聞

代人行在起居表德宗時

于公異

臣某言自中使至伏奉手詔後行在所未有人至伏以巴
 梁既遠信使全稀路有豺狼時當否塞東征西怨彼雖幸
 於南巡捧日望雲臣獨瞻於北極伏惟陛下以重慎為意
 以社稷為心每於寢膳類表必盡願攝况朱明啟夏小暑
 屆時曾觀蜀漢之風小異咸類表秦之氣尚衣侍膳之分
 莫敢侵官資父事君之誠空思入面違奉既久涕戀無從
 不任之至

同前

羊士諤

臣某言臣以菲才親奉昌運受潘隅之重任類表効犬馬
 之微誠惟君知臣特受恩獎夙興夕惕榮懼積中臣其中
 謝伏以租稅之殷江鄉為重閭井之化水旱是虞臣職在

分憂期於富庶宣陛下雨露之惠令獲小康守朝廷刑賞
 之規敢思中立條賦歛以辦集除疾苦而均安閉閣齋心
 仰思類表玄造竊以聖慈廣被每念遐方臣忝守官合具
 聞達

代張侍郎起居表

呂溫

臣某言孟秋猶尚集作熱伏惟聖躬萬福臣以去月二十一
 日到薄安山見蕃胡尚綺里徐等同集作令盈珍等却迴
 奏事令臣取今月發赴衙帳者伏惟聖德集作柔遠皇明
 獨幽蕃情大歡酋帥知感屢奉朝旨賓禮使臣迎勞肅恭
 饋餼豐潔益知集作嚮化彌表革心臣恭備單車不勝慶
 抃嚴程方始絕域未窮白日在天瞻仰如近青蒲之地伏

奏猶賒感戀彷徨罔知攸措無任大馬屏營之至謹因中
使第五忠憲附表起居以聞

文苑英華卷第六百九



